

05 JANUARI 2018

Dua pengedar dadah diberkas

Dua pengedar dadah diberkas

JOHOR BAHRU - Dua lelaki yang dipercayai mengedar dadah di sekitar bandar raya ini diberkas dalam satu pemeriksaan polis di Jalan Kempas Indah di sini semalam.

Ketua Polis Daerah Johor Bahru Selatan, Asisten Komisioner Mohd. Taib Ahmad berkata, dalam kejadian pada pukul 12.30 tengah hari itu, kedua-dua suspek masing-masing berusia 23 dan 29 tahun ditahan oleh sepasukan pegawai dan anggota dari Balai Polis Kempas yang melakukan rondaan cegah jenayah di kawasan terbabit.

"Hasil pemeriksaan, kita menjumpai tujuh pekot plastik lut sinar dan satu tiub penyedut minuman mengandungi serbuk warna putih disyaki

dadah jenis heroin seberat 19.46 gram (g) bernilai RM400 dalam poket seluar salah seorang suspek," katanya dalam satu kenyataan di sini semalam.

Menurut Mohd. Taib, pemeriksaan lanjut ke atas seorang lagi suspek polis tidak menjumpai apa-apa barang salah namun dia gagal menunjukkan dokumen pengenalan diri yang sah.

Tambahnya, semakan ke atas rekod lampau salah seorang suspek mendapati dia memiliki rekod jenayah lampau berkaitan dadah.

Kedua-dua suspek kemudian ditahan bagi membantu siasatan mengikut Seksyen 39B Akta Dadah Berbahaya 1952 dan Seksyen 25(1)(n) Peraturan-Peraturan Pendaftaran Negara 1990.